

君朴漢宗杖一百公罪收贖命功減一等只削奪官爵內侍金
碩鍊全富奇姜孟弼罪當絞命減死各杖一百流三千里盡奪
告身私奴洪香孫有淡絞待時命減死全家徙邊仍本役

史臣曰初帑庫盈溢間架狹促朴漢宗逢迎上意為添
房庫晝夜燃火遂致火焰一起焚蕩無餘先王百餘年積累
之基一夜燒盡祖宗在天之靈亦必驚惶失依而皇天譴
降之禍慘矣漢宗以先朝老宦因緣錄功遂致勢焰薰炙
威脅一時固為盛世之累矣而又犯前因死有餘罪而今止
削官嗚呼可勝痛哉

三月辛丑朔

壬寅清洪道觀察使安瑋拜辭傳曰近來凶荒民盡流離予甚

憫焉救荒諸事另加措置

瑋為人持心重厚臨事謹密格長
於吏治嘗救三州皆有聲績

癸卯日赤無光微雲雨草實或如雀豆或如佐槐子黃埃四塞夜四
更西方坤方巽方如火氣五更若霧非霧四方蒙瞽○傳曰近者
日候不調慮有不雨之徵又有兩種之異罔知所措